

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te faaroo nei matou e, o taua mau faaueraa ra; te matamuaraa, o te faaroo ia i to tatou Fatu ia Iesu Mesia; te piti ra, te tatarahapa ia; te toru ra, te bapetizoraa ia i raro i te pape ia matara te hara; te maha ra, te tuuraa rima ia no te horoaraa'tu i te Varua Maitai.” Parau 4 no te Mau Parau Matamua no te Faaroo.

Nu. 6.

Tiunu, 1913.

Mat. 6.

Teihea Ra te Parau Mau?

(TUATIRAA.)

MEIE te huru o te tatarahapa mau, o te eiâ na, eiaha e eiâ faahou; a rave râ to'na iho rima i te mea maitai, ia faufaahia ta'na ia horoa na tei ere ra. Mai te mea e tatarahapa mau te taata, e haapao maite oia i te mau ture o te evanelia ma te faariri ore i te Varua Maitai; e haapae noa oia i te mamahu ore, e te iria, e te riri, e te avau, e te faa-ino, e te taiiroiro, e e hamani maitai oia i te mau taata atoa ma te aaui mârû aroha noa, ma te faaore hoi i te hara mai ta te Atua i faaore mai i ta tatou i te Mesia ra. Ephesia 4: 28-32. Ua parau atura Paulo i to Korinetia, 'Te oaoa nei au, e ere râ no te mea i faaotohia outou, no te mea râ i oto outou ma te tatarahapa. O te oto hoi e au i te Atua ra, e faatupu ia i te tatarahapa, e tae noa'tu i te ora, eita ia e tatarahapahia; area te oto o teie nei ao, e faatupu ia i te pohe.' II Korinetia 7: 9-10. E teie te parau na te Mesia iho i nia i taua vahi nei, 'E faaite atu hoi au ia outou, e oaoa rahi to nia

i te ra'i i te taata hara hoê ia tatarahapa, i te feia parau-tia e iva noa'tu te ahururaa e iva tiahapa te ore e au ia ratou te tatarahapa.' Luka 15: 7. E mea papu roa ia tatou i teie nei e, o te ture piti o te evanelia, o te tatarahapa ia."

Ua parau maira Barone, "Ua tano maitai ta oe a'oraa, aita vau i ite i te hoê hape i ta oe parau. E te mana'o nei au e, maite mea e faaroo to tatou e te tatarahapa mai te reira te huru, e faaora-mau-hia tatou paatoa i te basileia o te ao."

"Eiaha tatou e faaea i reira," parau atura Tihare, "te vai atura te mau ture e haapao tatou e tia'i ia roaa ia tatou te ora mure ore. Ia faaroo tatou e, te vai nei te Atua, ei reira ua tupu te ite i roto i to tatou mau aau e, ua hara tatou i te Atua, e no reira e tatarahapa tatou e e titau i te mau mea e mauruuru ai oia. E titau atoa tatou i te faaoreraa i ta tatou mau hara na roto i te baptizo, e ravea teie ta te Atua i horoa mai ia tatou ia matara ta tatou mau hara."

"E te mana'o nei anei oe e, na roto i te baptizo e matara'i te mau hara a te taata nei?" parau maira te haapii ture.

"E, mai te mea e faaroo to te taata i te Atua, e e tatarahapa mau oia, e e baptizohia oia e te hoê taata tei haamanahia e te Atua ia rave i te reira ohipa; mai te mea râ aita o'na e faaroo i te Atua e aita oia i tatarahapa, e e baptizohia oia e te hoê taata tei ore i haamanahia e te Atua, e mea faufaa ore to'na baptizoraa." Te na reira'tura Tihare.

Ua parau maira Barone, "Te mana'o nei au e, e rahi to oe mau parururaa i te baptizo i to te mau haapaoraa atoa ta'u i faaroo."

"E paha," parau atura Tihare, "ia paruru-maitai-hia râ te mau parau atoa o te evanelia, e no te paruru ore i te mau parau tumu o te evanelia i rahi ai te mau haapaoraa o teie nei ao."

"E mea maere rahi te ite ia'u e, e rave rahi te mau purumu tei parauhia e aratai ia tatou i te vahi hoê," na reira maira Barone.

Ei reira parau atura Tihare, “E tamata tatou ia feruri i teie mau parau atoa. E hi‘opoa tatou i teie parau no te bapetizo. E au anei te reira? Te Fatu, na roto i to’na paari, i maiti e i tuu mai i teie nei oroa mo‘a i roto i ta’na ekalesia, ia riro te reira ei ravea, ia matara te mau hara a te taata tei haapao i te reira. Ua a‘o atura Ioane Bapetizo i te bapetizo tatarahapa ia matara te hara, Mareko, 1:4, e ua na reira’toa Petero i te mahana Penetekose. Ohipa 2:38. Na te mau pîpî e rave rahi i haapii i te bapetizo ei ravea na te Atua ia matara te hara.”

“Ua parau a‘enei oe e, e rau te huru o te bapetizoraa i roto i te mau haapaoraa. Eaha ta oe ravea?” parau maira Barone.

Ua parau atura Tihare “O te rave mau ana’e, o te ravea ia tei faaitehia i roto i te Bibilia. Ia bapetizohia te taata i te tau tahito, oia hoi i te tau o Iesu e ta’na mau pîpî, ua utuhia oia e te tavini a te Atua. Te parau bapetizo, e parau Heleni ia, e teie hoi te auraa, utuhiraa. Ua au te mau taata ite e te mau papai parau e rave rahi (mai Strabo, Dion Cassius, Mosheim, Calvin, Bossuet, Schaaf, Taylor, Baxter e Robinson te huru), i nia i te reira vahi. Ua parau ratou e, ua bapetizohia te feia tahito ma te utuhi i raro i te pape. Mea papu roa te Bibilia i te bapetizo. Na Ioane i maiti i te hoê vahi bapetizo i te mau taata, no te mea e mea rahi to reira pape. Ioane 3: 23. Ua bapetizohia Iesu i roto i te anavai, e ua haere mai oia i nia mai raro mai i te pape. Mareko 1: 5-10. Ua haere atura Philipa raua o te eunuka i raro i te pape. Ohipa 8:38-39. E ua faaaui Paulo i te bapetizo i te tanuraa e te tia-faahou-raa o te Mesia. Roma 6:3-5. Ua parau atura Iesu ia Nikodemo, ‘Ia ore te taata ia fanau i te pape e te varua e ore oia e ô i te basileia o te Atua ra.’ Ioane 3:5. Na roto i te utuhiraa ua fanau-faahou-hia tatou i te pape, e aita i tia ia tatou ia faaaui te bapetizo i te tanuraa e te tia-faahou-raa na roto i te tahi ravea ê. Tirara, te ite nei tatou i teie nei e, o te utuhiraa ana’e ia te ravea

mau o te baptizo, e no reira e imi tatou i teie nei i te mau taata e au ia baptizohia.”

“Te mau taata atoa o tei fanauhia i roto i teie nei ao,” parau maira te taote.

“E, mai te mea ua haapao ratou i na parau tumu ferurihia a'enei e tatou, oia hoi te faaroo e te tatarahapa, no te mea, na te Mesia i faaue i ta'na mau pipi ia haapii atu ratou i te mau parau atoa ta'na i haapii ia ratou, hou ta ratou baptizoraa i te mau taata. Mataio 28: 19-20. Ia faaroo te taata e tia'i, hou to'na baptizo-raa-hia. Mareko 16: 16. Ua faaroo to Samaria i te parau maitai o te basileia o te Atua, e te i'oa hoi o Iesu Mesia, baptizohia ihora ratou, te tane e te vahine atoa. Ohipa 8: 12. Ia ani te eunuka ia Philipa ia baptizo oia ia'na, parau atura Philipa e, 'Ia faaroo oe ma to aau atoa ra, e tia ia.' Ohipa 8: 37. Ei reira te mau taata'toa o tei haroaroa i te faufaa no te baptizoraa, e au ia baptizohia, mai te mea ua faaroo ratou i te Atua e ua tatarahapa i ta ratou mau hara i te matamua. Te haamana'o nei au i te parau na taua taata ra o Korenelio, e taata paieti e te mātā'u i te Atua; ua tae ta'na pure e ta'na horoaraa tao'a i nia, i mua i te aro o te Atua, e ia oti ia'na te baptizoraa, ua taiohia oia i ō te Ekalesia. Ohipa 10. E no reira, te ite nei tatou e, e au te mau taata'toa, maori râ te mau aiû e te tamarii rii, ia baptizohia, mai te mea e faaroo ratou, e e tatarahapa i ta ratou mau hara.”

Ua parau maira te taote e, “Te mana'o nei anei oe e, e mea au ore te baptizoraa i te mau aiû e te tamarii rii?”

“Oia mau; inaha, ua haapaohia te baptizoraa no te tatarahapa e au i te faatiaraa i te mau faaue no te faaoreraa i te hara. E aita a te aiû e hara, e no reira e mea faufaa ore to ratou baptizo-raa-hia.” Ua na reira'tura Tihare.

Ua parau maira te taote e, “Aita anei Iesu i parau e, 'A tuu mai i te mau tamarii rii ia haere noa mai ia'u nei?' ”

“Ua na reira'tura oia,” parau atura Tihare, “aita râ oia i baptizo ia ratou, na'na i haamaitai ia ratou, e no ta ratou parau-tia e te hara ore, ua parau oia e, 'O te ore e farii i te basileia o te Atua mai te tamarii aruaru ra, e ore roa'tu oia e ô i reira.' ” Mareko 10: 13-16.

(E tuatihia mai teie parau.)

Te Parau Tuatapapa no
Iosepha Semita.

(TUATIRAA.)

PENE XXXIII.

MATAHITI 1839-40.

Ua haere atura o Iosepha e to'na ra mau hoa e farerei i te Peresideni no te hau Amerika. To Iosepha mata'u-ore-raa. Te mata'u rahi no te Peresideni ra, no Vana Burena. Haere atura o Oresoni Haede, Aposetolo, e porohaere i te Evanelia i Ierusalem. To Boga hinaaro ia Iosepha e to'na ra mau taeae. Te poheraa no to Iosepha metua tane. Te riroraa o Navu ei oire mau. Te haapiiraa rahi, e te nuu no Navu.

[A faatiahia te hau Amerika i te matamua roa ra, ua rave ihora te mau taata paari i taua ohipa faatiaraa ra, mai te mana'o e, e noaa i te mau taata'toa, o tei parahi i reira, te hau, te oaoa, e to ratou tiamâraa. Te titau noa ra taua hau rahi ra ia rave i te mea tia; ia faaore i te mau peapea, e ia faatupu i te hau i rotopu i te mau taata'toa. O te reira hoi te mana'o o te Peropheta ra, o Iosepha, i te hau Amerika, e ua opua ihora oia e haere e faaite atu i te huru no to ratou hamani-ino-raa-hia i te peresideni rahi no taua hau ra, e e imi i te mea tia i reira, no te mea e ore to Missouri e faatupu i te hau e e rave i te mea tia i te Feia Mo'a. Ua ite ihora tatou i te huru no to ratou peapea. Ua moe ia ratou to ratou mau fenua, e te mau fare, e te mau puaatoro, e aita roa hoi i faatiahia ia haamori atu ratou i te Atua mai tei au i to ratou iho hinaaro, e ia parahi maite noa ma te hau i te vahi i hinaarohia e ratou ra.

I te pae hopea no te matahiti 1839, haere atura o Iosepha ratou o Sidine Ritidone, e o Elia Higebe, i te oire ra, i Wasingatona, e faaite atu i to ratou peapea i te peresideni rahi, e i te mau pŭpŭ taata, tei faatere i te hau Amerika, e e

ani atu ia ratou i te moni, e hoê afa milioni dara, no te mau fenua i haruhia e te mau taata no Missouri. A haere atu ai ratou na nia i te hoê pereoo puaahorofenua i roto i te mou'a, faarue ihora te taata faahoro i to'na vahi, a haere atu ai oia e inu i te ava. Ua haamăta'uhia te na puaahorofenua, e horo taue noa'tura na te hoê aivi, e mehameha roa'era te mau horo patete.

Aore roa o Iosepha i ahoaho i taua taime ra, e ite ihora te mau taata i to'na măta'u-ore. Ua tamata noa oia i te faahau e te faaitoito i te feia horo patete, e tapea ihora oia i te hoê vahine, o tei fatata i te faarue i ta'na aiû i rapae i te haamaramarama no te pereoo. E iriti a'era oia i te opani no te pereoo, tamau a'era i te parahiraa no te taata faahoro, e no to'na puai, ume maira oia ia'na iho, ia parahi oia i nia iho i taua parahiraa ra, e ua rave ihora oia i te tavaha no te puaahorofenua, e aita i mahia i haavîhia'i taua na puaahorofenua ra e a'na.

Ua mauruuru roa te feia horo patete ia Iosepha, no te mea ua faaora oia ia ratou. Ua haamaitai, e faatura noa a'era ratou ia'na no to'na măta'u-ore. Tei rotopu i taua mau taata ra, te tahi mau melo no te mau pŭpŭ taata tei faatere i te hau Amerika, e parau atura ratou e, ia tae atu ratou i mua i te amuiraa no taua mau pŭpŭ taata ra, e faaite atu ratou i teie ohipa maitai i ravehia ra; ia iteahia râ e, o Iosepha Semita ia to'na i'oa, faaea ihora ratou i te haamaitai, e te faatura'tu ia'na, e aita roa ratou i parau faahou no taua mea ra.

Ua vaiihohia o Sidine i te oire ra, i Philadelephia, no to'na poheraa i te ma'i, haere noa'tura râ o Iosepha, raua o Higebe, e i te mahana i muri a'e i to raua taeraa'tu i Wasingatona, i te 29 no Novema, farerei atura raua i te Peresideni ra, ia Vana Burena, e horoa'tura i te tahi mau leta, tei faaite atu i to raua tere ia'na. Ua taio ihora oia i te hoê leta, e tuatua'tura to'na mata, e parau atura oia e, "Eaha e nehenehe ai ia'u ia rave? Eita e nehenehe ia'u ia tauturu

atu ia outou na. Mai te mea e na reira vau, e riro vau i te patoi atu i te mau taata'toa no Missouri." Aita Iosepha i mātā'u i taua parau ino ra, e faaite papu atura oia ia'na i te i te huru no te hamani-ino-raa no to Missouri i te Feia Mo'a; i to ratou haparaa i te mau ture, e te mau hara rarahi i ravehia e ratou ra. Ua putapū te aau no Vana Burena, e ua parau atura oia e, e feruri oia i nia iho i taua mau mea ra.

Ua faaineine ihora o Iosepha e ta'na hoa i te hoê aniraa roa, ia taiohia i mua i te mau pūpū taata faatere no te hau. Ua farerei raua i te hoê tomite no roto mai i taua mau pūpū taata ra, e faaite papu atura i to raua peapea ia ratou ra. I muri a'e i te reira, farerei faahou atura raua ia Vana Burena, Peresideni; i teie nei râ ua etaeta faahou to'na mana'o, e parau atura oia i te parau mātā'u roa e, "Ua tia roa ta outou mau aniraa, eita râ e tia ia'u ia rave i te hoê mea no outou. Mai te mea e tauturu atu vau ia outou na, e moe ia'u te mau parau maitiraa na to Missouri."

Aita roa to Iosepha tere i Wasingatona i manuia maitai, area râ ua a'o atu oia i te tahi mau parau maitatai no no nia i te Evanelia, e rave ihora oia i te ohipa maitai, i te haaparareraa'tu i te parau mau, e ua noaa ia'na te mau hoa apî e rave rahi. Ua farerei, e ua paraparau oia i te mau taata rarahi no te hau Amerika, ei reira ite ihora oia i te huru o te mau taata o tei faatere i taua hau rahi ra.

I te amuiraa no te Ekalesia i te Eperera, 1840, ua parauhia te Aposetolo ra, o Oresoni Haede, ia haere i Ierusalema e poro-haere i te Evanelia i taua fenua ra. Ua parau-atoahia o Ioane E. Page, Aposetolo, ia haere, aita râ oia i haapao. E iva mahana i muri a'e i to Oresoni parau-raa-hia, haere atura oia i te Fenua Mo'a ra, e ia tae atura oia i reira, tia a'era i nia iho i te mou'a Oliveta, e pure atura oia i te hoê pure maitai, i te haamaitairaa'tu i taua fenua ra no te haaputuputuraa mai o te ati Iuda i to ratou iho fenua mau. E i muri a'e, haere atura oia i Europa, e i te fenua ra, o Eremania, nenei ihora oia i te tahi mau parau, i te faaite-

raa'tu i te huru no te faatia-raa-hia o te Ekalesia, e i ta'na mau haapiiraa. Ua parahi oia i taua fenua ra e piti matahiti.

I te tau veavea no te matahiti 1840, ua haere maira te tahi mau taata i Navu, no ô mai i Missouri, e haru noa ihora ratou i na taeae e toomaha, oia hoi, ia Iakobo Aleda, o Alasona Barone, e Noa Rogera, e Beniamina Boice, e ua fatata roa ratou i te pohe i te mau hamani-ino-raa na teie nei mau taata iino no Missouri. I te tahi tau avae i muri a'e i te reira, i te 15 no Setepa, ani atura te tavana ra, o Boga, no Missouri, i te tavana ra, ia Caralina, no Ilinoi, ia tapea ia Iosepha Semita, Sidine Ritidone, Limana Uaita, Pare P. Paraita, Caleba Baladawina, e ia Alasona Barone, no te mea ua faarue ratou i te mau fare auri no Missouri.

Ua ite noâ te tavana ra, o Caralina, e, o te taparahi taata ia te opuaraa no Boga, papai ihora oia i te hoê faaueraa no te tapearaa i teie nei mau taeae, e ua tonohia maira te mutoi rahi i Navu, mai te hopoi mai i taua parau ra. Ua tapuni ihora Iosepha, e te mau taeae, o tei parahi i Navu, no te mea ua ite ratou e, mai te mea e afaihia ratou i Missouri, e rave mau te mau taata no Missouri i te mea tia ore roa. Ua faaho'i atura te mutoi rahi i taua parau faaueraa ra ia Caralina, e haere faahou maira Iosepha ma i rotopu i te mau taata.

I te mahana i mua'e i te papai-raa-hia o te parau faaueraa no te tapearaa ia Iosepha ma, ua pohe roa'era Iosepha Semita, tupuna, te Patereareha matamua no te Ekalesia. No te mau ati rahi, e to'na hamani-ino-raa-hia i pohe ai oia ra. Ua tamau noa oia i te faaroo e tae noa'tu i to'na poheraa, e ua pohe oia no te parau mau. I te 24 no Tenuare, 1841, ua parauhia o Haeramu Semita ei Patereareha matamua no te Ekalesia, e ua maitihia o Viliamu Lau ei tauturu piti ia Iosepha, e ei mono no Haeramu.

Ua tupu oioi roa o Navu i te rahiraa e ua hanere te mau fare nehenehe, tei hamanihia i reira. Ua ani atura te mau

taata no Nauu i te mau pŭpŭ taata faatere i te tufaa fenua ra, i Ilinoi, ia faariro mai ia Navu ei oire mau, e papai atura Iosepha i te tahi parau, mai te faaite atu i te mau meata ratou i hinaaro. I te avae Ditema, ua farii taua mau pŭpŭ taata ra i te parau ta Iosepha i papai atu, e papai ihora te tavana rahi i to'na i'oa i nia iho. Ua faaite atura teie nei parau e, ua hinaaro te mau taata i te hoê tavana oire, e te tahi atu â mau taata faatere, e i te hoê haapiiraa rahi, e i te hoê nuu atoa hoi.

Ua haapaohia te maitiraa i te mau taata toroa no te oire apî i te mahana hoê no Febuare, e ua maitihia o Ioane C. Benete ei tavana oire. Ua maitihia Iosepha ei hoê taata tauturu i te faatere i te oire, e i te apooraa matamehai i haapaohia, tuu atura oia i te hoê parau aniraa no te faatiaraa i te hoê haapiiraa no te oire. Ua fariihia taua parau ra e te mau taata faatere paatoa, e maitihia a'era oia ei taata faatere no taua haapiiraa ra. Ia faatihia te Nuu no Navu, ua maitihia o Iosepha ei raatira rahi no taua nuu ihora. E no reira ua ite tatou e, ua rave to tatou Peropheta i te mau huru ohipa'toa, i ta'na tamataraa i te riro ei taata maitai. Ua farii ihora Iosepha i taua mau toroa ra, ia tia ia'na ia tauturu puai atu i te faatiaraa i te hoê oire maitai, e i te faaoreraa i te mau mea iino, o tei mâtau i te tupu i te mau oire atoa, e no to'na hinaaro i te tauturu atu, e i te haapii atu i te parau mau i te mau taata'toa ra.—OLE PETESONA.

(E tuatihia mai teie parau.)

“Ua hinaaro hoi au ia haamana'o outou i te maitai e te oaoa o te taata e haapao i te mau faaue ra a te Atua. Inaha hoi, e haamaitaihia ratou i te mau mea atoa, o te tino nei e o te Varua atoa hoi; e ia haapao maitai ratou e tae noa'tu i te hopea ra, e fariihia ia ratou i te ra'i ra, ia parahi ratou e te Atua atoa i roto i te oaoa hope ore ra. E haamana'o e, e parau mau ia teie mau parau nei, e na te Fatu ra na te Atua i parau maira.” Buka a Moromona; Mosia, 2: 41.

"St. MICHEL."

Te Pahi Auahi no te Mau Fenua e
Au Mai i Tahiti Nei.

Te tere no Tiunu, e riro i te mahana 14.

E haere te pahi i teie tere, mai Papeete nei atu i Raiatea, Rimatara, Rurutu, Tubuai, Raivavae, Rapa, Maareva, Hao, Takume, Marutea, Hikueru, Anaa, ei reira ho'i mai i Papeete nei.

Hoê â ia fenua te haerehia e te pahi i roto i Ditema; na teie râ i muri nei te faaho'iraa.

Te tere no Tiurai, e riro i te mahana 10.

E haere te pahi i teie tere, mai Papeete nei atu i Fakarava, Anaa, Makemo, Marutea, Takume, Hao, Fakahina, Atuana, Taiohae, Takaroa, Rangiroa, Raiatea, ei reira ho'i mai i Papeete nei.

MONI NO TE MAU TAO'A E FAAUTAHIA NA NIA I
TE PAHI, O TE AU IA FAAHURU-E-HIA
I MURI A'E.

No te mau fenua i apatoa	35 f. te tane.
No te mau fenua Maareva	40 f. te tane.
No te mau fenua Tuamotu	30 f. te tane.
No te mau fenua Matuaita	40 f. te tane.
No te mau fenua i raro	15 f. te tane.

MONI NO TE MAU HORO PATETE, O TE AU IA FAA-
APIHIA I MURI A'E.

- Numera 1.— Maa e te piha—1 f. no na maile e 6 e terehia.
Numera 2.— Maa e te piha—0.80 f. no na maile e 6 e terehia.
Numera 3.— Maa e te tamârû—0.60 f. no na maile e 6 e terehia.

Te feia e faaea noa i nia i te tahua o te pahi, e moni
mâmâ roa ia te anihia.

Te Mau Parau Api.

U A û na pereoo auahi e piti, î roa i te faehau no Bulagaria. Ua pohe roa e hoê hanere faehau, e ua haaparuparuhia e toru hanere.

I teie nei mau avae ua tae i raro roa te hoê pahi hopu i San Francisco. Ua haere i raro roa e tae e 283 avae te hohonu, e ua faatere oia e 10 hora e ua roaa ia'na e 6 maile i te hora hoê. E mea maere roa te ohipa o te taata nei i teie nei anotau.

No iteahia a'enei te hoê maere, mai tei iteahia i Beritane i teie nei mau avae. I te 24 no Febuare, ua fanau maira te hoê vahine i te hoê ia tamaroa, e e ono hebedoma i muri iho, oia hoi, i te 14 no Eperera, ua fanau faahou taua vahine ra i te hoê tamahine. Te parau maira te tahi mau taata e, e maehaa taua na tamarîi ra, e ua parau maira vetahi e, aore ia.

Tei roto i te oire i Bombay i te fenua, i India, te hoê fare ma'i no te mau animala ana'e. Ua haapao-maite-hia te mau animala pohe ma'i mai ta tatou e haapao i te taata ma'i i roto i to tatou mau fare ma'i ra. I teie nei matahiti a'enei ua fariihia i roto i taua fare ma'i ra e 2,000 e tiahapa mau animala e ua utuutu-maitai-hia e ua ora te pae rahi. E maha ahuru te rahi o te mau fare o taua ohipa ra, e e fariihia te mau huru animala atoa, te mea rata, e te oviri e tae noa'tu i te mau puaa taehae, e te mau manu maue.

Te hamani nei te hoê sotaiete i Beritane i te ahu no roto i te parau e ua parauhia e mea maitai. I te matamua ua hamani ratou i te ahu oomo, e ua maitai, e i muri iho ua hamani ratou i te mau huru ahu e tae noa'tu i te mau horoi, e ua maitai. E mea rau te huru o te parau, te tahi ua uouo, e te tahi ua ninamu, e te tahi patapata, e ua rau hoi te huru; te tahi ua mārû mai te tiriti te huru, te tahi ua au i te paruai, e no reira e oti i te mau huru ahu. Te vai atoa te mau huru parau paari roa e eita hoi e nehenehe e pihaihai noa no to'na paari ra.

Ua faatitiaua te tahi mau taata i te ohipa papai poto, oia hoi te ravea e papai na roto i te tahi mau tapao. Ua parahi taua mau taata o tei tamata i taua ohipa ra i mua i te hoê haavâ, e na te haavâ i orero atu i te hoê parau ma te faahiti oioi roa i te mau parau ta'na i parau ra, e ua tamata taua mau taata ra i te papai na roto i te hoê ravea poto te mau parau ta te haavâ i parau maira. Ia oti taua ohipa ra ua hi'opoahia te ohipa i oti i taua taata ra, e ua iteahia e pae noa iho taata, o tei papai hope roa i ta te haavâ i parau mai, e e mea iti roa te mau hapahapa rii. Na te hoê o taua mau taata ra i papai ma te afaro e 278 parau i roto i te minute hoê ra, e ua roaa ia'na te rê, oia hoi te hoê au'a ario i faanehehebia.

Te opua nei te arii ra, o Tihoti, e te arii vahine ra, o Maria, no Beritane, e haere atu ai i Purutia no te faaipoiporaa o te tahi mau fetii hui arii.

Te vahi hohonu roa i iteahia i te miti Patitifa nei, ua iteahia ia e te hoê pahi no te Purutia. I ô atu i pihaiho i te mau motu Philapine taua vahi hohonu roa ra, e o to'na hohonu, ua tae e 9,780 metera. Ua hohonu roa te miti Patitifa nei i te miti i tera pae mai, oia hoi, te miti Atalanata.

I na avae a'enei, a tama'i ai Italia raua o Turekia, ua haru Italia i te hoê pahi auahi no Farani, o Carthage to'na i'oa, e ua tapea rii oia i taua pahi ra, mai tei faaitchia i roto i te vea nei i na avae a'enei. I teie nei ua faautuahia o Italia no to'na tapearaa i taua pahi ra, e o to'na utua, e 27,000 dara ia. Na te apooraa i Hague teie ohipa i hi'opoa, e na taua apooraa ra i faautua ia Italia.

Te peapea noa ra te mau fenua i Balakina. I te matamua ua amui mai taua mau fenua iti ra i te tama'i atu ia Turekia, e ia pohe atu o Turekia, ei reira ua tama'i ratou ia ratou iho, e te huru, eita e maoro e peapea rahi to ratou. I te haamataraa o te tama'i i ropu i te mau fenua i amuihia, oia hoi o Balakina, e Turekia, ua roaa i to te Balakina te hoê ia fenua, oia hoi o Salonique, ei reira ua tapeahia taua fenua ra e to Heleni, ei fenua no ratou; e no to Heleni tapearaa i taua fenua ra, ei fenua no ratou, i faainoino mai ai o Bulagaria ia Heleni. Mai te haamataraa o teie nei tama'i, ua pohe e 29,000 faehau no Bulagaria, e e 52,640 faehau i haaparuparuhia.

I roto i te vea no Me ua faaitchia te hoê mau ohipa maamaa i ravehia e te tahi mau vahine i Beritane, o tei hinaaro ia faatiahia te mau vahine ia maiti atoa ratou i roto i te mau maitiraa no te Hau i te mau taata toroa o te fenua. Te rave noa ra taua mau vahine i te mau ohipa haamâ e te hura ê, mai te tupararî i te mau hi'o haamaramarama no te mau fare hau e no te mau fare o te feia toroa, o tei patoi mai i to ratou mau hinaaro. Na taua mau vahine i tutui i te tahi mau ohipa i roto i te hoê fare pure, e ua pau taua fare pureraa i te auahi; ua vaiho atoa te tahi mau topito paura i roto i te mau vahi e rave rahi, e te hopea e riro te tahi mau taata i te pohe. Mai te haamataraa o teie nei peapea ua faautua e 1,000 vahine, e i roto i te avae Me, ua faautuahia te hoê vahine faatupu i te peapea i te utua e toru ia matahiti i roto i te fare auri. No te ohipa hupehupe e te maamaa ta te mau vahine i rave, te mana'o ihora te mau feia toroa e mea maitai roa ia, eiaha te mau vahine e faaô i roto i te ohipa maitiraa.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.